

24. marts 2015

**Inatsisartut aalajangiiffigisassaattut siunnersuut Naalakkersuisut peqquneqassasut Nukissi-
orfinnut nalunaaruteqaqqullugit, akinut suliffeqarfiup allattorsimaffiani allaqqasut alla-
nngortinneqassasut, siunissami ima allassimalerluni innaallagissamut atuisut nunami aali-
sakkanik suliffissuarnut innaallagissamut akikillisaaffigisaraat aammalu imermik atuisut
nunami aalisakkanik suliffissuarnut imermik akikillisaaffigisarai, maannakkutut ikkunnaar-
luni Nuummiuunerusut ataatsimoorullugu kiassarnermik atuisunit akilerneqartarunnaar-
sillugit.**

(Inatsisartunut ilaasortat, Siverth K. Heilmann aamma Steen Lynge, Atassut)

Siumup anguniarpaa nunatsinni nukissiuutitigut atugassarititaasut nalilersuiffigineqarnissaat, taama-
tullu atuisuusut sapinngisamik akikinnerusumik pitsaanerusumillu nukissiuutitigut atugaqarnissaat,
tassani innuttaasuuppata inuussutissarsiortuuppatalunniit apeqqutaatinnagu.

Nunatsinni piffinni arlalissuarni erngup nukinga atorlugu nukissiuuteqarnikkut ineriartortitsisi-
maneq ajunngilluinnartumik kinguneqarsimavoq, inuiaqatigiillu mingutsitsinnginnerusumik akikin-
nerusumillu nukissiuutitigut atugaqarnissaat tassuunakkut annertuumik aamma tunngavissinne-
qarsimasoq Siumumiit oqaatigerusupparput.

Siumup qineqqusaarnermi ilaatigut erseqqaarissumik oqariartuutigaa suliffissuarnut innaallagissa-
mut, imermut kiisalu kiassarnermut akigitinneqartut nuna tamakkerlugu assigiittariaqartut. Taman-
nalun nunatsinni tamarmi tunisassiornerup annertusarneqarnissaannik siunnerfeqarmat inuiaqatigiin-
nut pitsaasumik kinguneqarnissaa naatsorsuutigaarput.

Taamatut oqariarluta inuiaqatigiit ataatsimut isigalugit nammaqatigiinermik anguniagaqarluni apeq-
qutip massumap ilusilersorneqarnissaa kissaatigaarput, taamatuttaaq Naalakkersuisut nukissiuu-
teqarnerup aaqqissuuteqqinneqarnissaannut ilusilersuinissami ilanngullugu nalilersussagaat Siumu-
miit kaamattuutigaarput.

Siumumiit taamatut oqaaseqarluta aalajangiiffigisassatut siunnersuutip Sanaartonermit Ataat-simiititaliami nalilersorluarneqarnissaa kaammattuutigalugu suliassanngortinneqarnissaa innersuus-sutigaarput.

Anders Olsen,

Siumut